

Da poi disnar, fo ordenato far Consejo di X et Pregadi, et prima si reduce il Consejo di X in cheba con la Zonta, et stetano assae. Fo dito in materia di brexani, et voleno far che sier Hironimo da Pexaro vadi in Brexa, atento sier Andrea Griti procurator non vol averlo per compagno in campo.

Et in questo mezo che 'l Consejo di X stete dentro, hessendo solo a la bancha sier Francesco Soranzo cao di XL, fo leto ste lettere.

Di sier Hironimo da cha' da Pesaro provedador zeneral di Terra ferma, date a Lonà a dì 18, hore 2. Come eri a hore 23 scrisse, et eri sera ebbe lettere di Troylo Pignatelo e Farfarelo capi di cavali lizieri, fate a hora di terza a Calvisan, come in quella hora li fanti erano levati di Valezo et in ordenanza venivano a Calvisan. Dil Signorelli è alozato *etiam* lui ivi vicino, quali tutti tre capi essendo passati li fanti verano da lui. Li fanti sono alozati li apreso Lonà, et da matina esso Provedador si partirà per Castegnedolo. Scrive aver ricevuto do lettere, una drizata a lui e a sier Polo Nani zercha li fanti grisoni, l'altra a lui con una va al Governador per la libertà di passar Po etc. con l'exercito. Prima zercha Grisoni exequirà etc., quanto a dover passar Po, volendo cussi Lutrech farà etc., et ha mandà la lettera drizata al Governador.

La lettera drizata da Troylo Pignatelo e Farfarelo, data a Calvisan, a dì 18. Come a 161 • hora di terza li fanti si levono di Valezo e andono in mantoana, et loro erano retirati li a Calvisan etc., e che i loro cavali erano strachi per la factione facta, et che 'l capitano Castelalto era stato da loro incognito a parlarli solo, et rasonono insieme. Quello disse ge lo dirà a bocha a esso Provedador zeneral, al qual scriveno. Diceno per l'altra erano fanti 5500 mal armati et persone inutile, et 100 di loro non è boni e sono cergi di femine.

Di sier Polo Nani capitano di Bergamo, date a Castegnedolo, a dì 18, hore 3 di note. Scrive coluqui auti col Governador: come voria 300 guastadori per far spianade. *Item*, monsignor de la Mota, ritornato da la Signoria nostra, ozi zonse qui, stete assae a parlar col Governador, col qual disse esso Governador ha fato bon offitio. Hironimo Anzoleti vicecolateral *etiam* ha expedito li danari a li valesani. El Provedador zeneral Pexaro doman sarà qui, et el Governador e lui Nani anderano ad alozar a Scrive 6 pezi di artelaria fusse mandati da Brexa per campo, e quelli rectori non l'hanno voluti dar. *Item*, voria si mandasseno li colari per li ca-

vali de l'artelaria. *Item*, ha auto la lettera di la Signoria nostra al Pexaro et lui etc. *Item*, manda una lettera di Hironimo Anzoleti vicecolateral, li scrive etc.

Di Hironimo Anzoleti, vicecolateral, data a Codogno in bergamasca, a dì 17, hore 4, drizata al capitano di Bergamo sier Polo Nani. Lauda la deliberation fata di unirse li exerciti. Li valesani è stà expediti e pagati, da matina si aviarono a Varola Gisa, et il capitano Guisaldo ha dito voria aver arme et pagarle a la terza paga. Sono bella zente, ma non armati. Sono 1300; è meglio questi che 5000 italiani. Chi avesse apresso 2000 grisoni, valeria per 5000. Ha auto gran fatica, non ne voria una altra per ducati 200.

Di sier Zuan Vituri podestà e vice capitano di Bergamo, date a Codogno, a dì 18, hore 13. Eri a hore 16 scrisse, che avendo principiato a far 162 la mostra, sopravene gran pioza. Hor poi disnar tornò a farla, e prima li vete in campagna contadi a sete a sete, justa el costume loro, e pagati, e auto el rotolo in todesco, e lo manda al Provedador zeneral. Sono pagati numero 1315. Hanno cassi molti, quali li farà acompagnar fino sul milanese aziò tornino a caxa loro. Ozi diti valesani anderano sul brexan. Hanno mosso nel pagar molte difficultà zercha li ori e monede, pur hanno contentà tuor l'ongaro a lire 6 pizoli 18, li altri lire 6 pizoli 16, come core in bergamasca. Lauda sier Hironimo Gradenigo camerlengo di Brexa qual li li ha pagati. E il capitano Guidon dice vol portarse ben con la Signoria; ma bisogna siano pagati al so tempo come vien pagati quelli è col re Cristianissimo. Vorìa corsaleti e piche da Brexa, e pagarle su l'ultima paga. Sono bella zente, ma li manca *solum* esser armati.

Et stato el Consejo di X assa' in cheba, a la fin veneno suso.

Fu posto, per li Savii una parte: atento el bisogno di elezer *de presenti* 5 Savii a trovar danari per seurtinio con pena da esser eleti di ogni loco et officio continuo e di quelli è con pena, excepto dil Colegio, quali debano da mo' per tutto il presente mexe venir a questo Consejo con le opinion loro etc. *Item*, atento fusse preso elezer 12 Savi etc. sia corretta, *videlicet* elezer 20 Savii dil corpo di questo Consejo, quali 10 di loro debano exequir quanto li sarà imposto per questo Consejo; e perchè ne la parte del 1411 voleano li ditti non possino esser electi etc. *ut in parte*, dito capitolo sia revocato. Andò la parte, ave non sincere . . . 30 di no.

Fu posto per li Savii prediti elezer uno Pagador